



**Uunga siunnersuut: Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaata allanngortinnera pillugu Inatsisartut inatsisaat (Silap pissusianik pissuteqartumik ajornartorsiornermi ajunaarnersuarnullu assingusuni pisuni aallarteqqinnissamut tapiissutisisinnaaneq, akiliutigineqartartut qaffaneri kiisalu qinnuteqarnermi piffissaliussat eqqunneqarneri)**

(Aalisarnermut Piniarnermullu Naalakkersuisoq)

(Siullermeerneqarnera)

Naalakkersuisut qujanaq siunnersuummut.

Pingaartuuvoq uagut inuiaqatigiittut inuussutissarsiortut ikiorsernissaannut piareersimanissarput, namminnek pisuussutiginaagu ingerlataminnik ingerlatsinissamik tassanngaannartumik annaasaqarnerminni imaluunniit silap pissusaata allanngorneranik kingunilimmik ajunaarnersuaqassagualarpat.

Demokraatit tamanna tunngavigalugu siunnersuut una ilalernartippaat.

Isumaqarpugulli, pissutsit arlaqartut misissorluaqqaarneqassasut.

Siullertut allanneqarsimavoq tapiissut annerpaamik 50.000 koruuniussasoq. Tamanna eqarpallaarsorinarpoq. Siumoortumimmi takorlooruminaappoq, suna aallarteqqinnissamut tapiiffigineqassanersoq qanorlu akeqassanersoq. Taassuma saniatigut miserrattissaanngilaq, nunarsuarmi pissutsit maannakkorpiaq allanngorarlutillu naatsorsuutigisassaangitsumik inissisimmata, ilaatigut assersuutigalugu ukiuni kingullerni aningaasat naleerukkiartornerat annertoq kalluaasimalluni. Nikalluallannassaaq, inatsimmi tapiissutissatut killissarititaasup aallarteqqinnissaq pinngitsoortissappagu, uffa tapiissuteqarfigineqarnissamut piumasaqaatit naammassereersimagaluaaraat. Taanna isiginnineq misissorluarneqartariaqarpoq.

Aappasaatut qinnuteqarfissatut killissarititaasooq isiginiarneqartariaqarpoq. Siunnersuutigineqarpoq, ingerlatalik ajoqusernerup imaluunniit tammaasaqarnerup kingorna ullut 30 kingusinnerpaamik qinnuteqassasoq. Paaserusunnarporlu siunnersuutigineqartut ullut 30-vit ilumut naammannersut? Aallaavittummi naatsorsuutigineqartariaqarmat, inuussutissarsiortut eqqorneqartut sukkanerpaamik aallarteqqinnissamut tapiiffigineqarnissamut qinnuteqarnissaq soqutigissagaat. Imaattoqarsinnaavorli, ajutoornermi assigisaaniluunniit piffissaq sivisunerusoq naliliinnermut atorneqassasoq. Tamanna tunngavigalugu misissorluaqqunarpaq piffissaliunneqartoq qinnuteqarnissamut pissusissamisoornersoq.

Siunnersuut taamatut oqaaseqaaserlugu Aalisarnermut, Piniarnermut Nunalerinermullu ataatsimiititaliami suliareqqitassanngorlugu innersuunneqarpoq.